



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
12 Maiu 2014

JSMP organiza treinamentu kona-ba justisa ba ema hotu iha Eskola Sekundária Nú. 1 Maliana

Iha 8 Maiu 2014, Judicial System Monitoring Programme (JSMP) liuhosi unidade LRU no Relasaun Públiku fasilita treinamentu ba estudante Sekundaria Nú. 1 Maliana, Distritu Bobonaro. Treinamentu ne'e ho objetivu atu hasa'e kuñisementu estudante sira kona-ba lalaok justisa formal tuir lei aplikavel.

Total estudante ne'ebé partisipa iha treinamentu ne'e hamutuk ema nain 30, kompostu husi mane nain 12 no fetu nain 18.

Materia ne'ebé apresenta iha treinamentu ne'e kona-ba sistema justisa formal ho ninia lalaok, liu-liu foka ba asuntu sira relasiona ho direitus umanus, lei formal ne'ebé vigor iha Timor Leste, klasifikasaun tipu kazu krime tuir lei aplikavel no oinsa atu asesu ba justisa formal wainhira sai nu'udar arguidu ka sai hanesan vítima husi krime ruma.

“JSMP vokasionadu atu kontinua habelar informasaun legal sira ne'e tanba estudante sira mos dala barak risku ba violénsia no sira la hatene oinsa atu lori prosesu ne'e tuir sistema justisa formal. Treinamentu ne'e importante atu hasae koñesimentu estudante sira atu hatene kona-ba prosesu legál iha kazu krime hanesan kazu violénsia seksuál, violénsia bazeia ba jéneru ka krime ho natureza sira seluk no oinsa atu involve sira iha prosesu hametin justisa ba ema hotu,” dehan Diretór JSMP, Luis de Oliveira Sampaio.

Diretór Eskola Sekundária Nú. 1 Maliana, Sr. Juvencio de Jesus, iha abertura no enseramentu hato'o apresiasaun relasiona ho atividade treinamentu ida ne'e. Nia hatutan katak estudante hanesan futuro ba nasaun, nune'é sira persija hatene kona-ba lalaok justisa formal no bele aplika iha sira nia moris loron-loron

Durante sesaun treinamentu, JSMP observa katak estudante sira hatudu sira nia interese hodi partisipa ativu tebes atraves husi husu perguntas no apresenta sira nia esperensia ho enerjétiku. Estudante sira hateten katak treinamentu kona-ba justisa formal ne'e foin primeira vez sira simu. Tanba ne'e sira manifesta laran kontente no apresiasaun ba JSMP atraves husi treinamentu no divulgasaun informasaun legál importante hirak ne'e.

Atividade treinamentu ne'e realize tanba hetan suporta orsamentu husi Justice Facility.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
telefone: 3323883/77295795
webiste: www.jsmp.tl

facebook www.facebook.com/timorleste.jsmp
twitter: @JSMPtl